

# INUIT ATAQATIGIIT

## Inatsisartuni



UKA 2018/202  
Ulloq 09.10.18  
Mimi Karlsen

### **Uunga siunnersuut: Katersugaasiveqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq** (Mimi Karlsen, Inuit Ataqatigiit)

Inuit Ataqatigiit Naalakkersuisut qutsavigiumavaat Katersugaasiveqarneq pillugu Inatsisartut inatsisaannut allannguutissatut siunnersuummik saqqummiussinerannut.

Siunnersuummi aalajangersakkamik ilanngussisoqarpoq Nunamut Allanngutsaaliugaasumut, sumiiffimmut uumassuseqarfiusumut Avannaarsuani Kangianilu inissisimasumut, inuit pilersitaat tigussaasut uatsinnit kalaallinit aallaavillit eriagineqartullu, soorlu makku eriagisagut qimatuliviit, killuut, pullatit ungooriviit ilivitoqqalluunniittulluunniit qanoq nutaanngitsigineri apeqqutaatinnagit nunatsinniit anninneqarsinnaanngitsut, Nunatta Katersugaasivianit Allagaateqarfianillu akuersissutitaqanngitsumik. Tamanna pingaarluinnartutut isigaarput.

Iluarilluinnarparpullu piginnaatitsissummik imaqarmat, Naalakkersuisunik periarfissiisumik sumiiffinnut immikkut killilikkanut tunngatillugu malittarisassiorsinnaanermut, inuit pilersitaat, kalaallinit aallaavillit, qanoq nutaanngitsigissusii apeqqutaatinnagit nunatsinniit annissisoqarsinnaannginnera pillugu, Nunatta Katersugaasivianit Allagaateqarfianillu akuersissutitaqarsimatinnagu.

Katersugaasiviit siulersuisuini kommunit aammalu Nunatta Katersugaasivia siulersuisuutitsisinnaapput. Uani apeqqutiginiarparput katersugaasiviit namminersortoqarpat taakku qanoq inissisimassanersut? Katersugaasiviit pillugit siulersuisunut ilaasinnaappat?

Nunatsinni eriagisassatut isigisagut tassaapput atortut, sakkut allallu siulitta inuuniarnerannik inooriaasiannillu oqaluttuartut. Siulitta pilersitaannik ilisimasaqarnerput siunissami qanoq iliorumaarniarnitsinnut aqqutissiuusseqataassaaq. Taamaammat Inuit Ataqatigiit pingaartipparput kulturitsinnik eriagisagut, pingaartitagut aqqutigalugit oqaluttuarisaanitsinnik nammineq oqaluttuarisnaassalluta. Eriagisagut nunanut allanut aallarunneqarsimasut nunatsinnut utertissinnaanissaat pingaaruteqarpoq, tassami ilisimatusarnikut paasisaqarfiusinnaanerat pingaaruteqarpoq.

Suulluunniimmi pingaartitagut, oqaluttuarisaanitsinnut pingaarutillit eriagisagullu nammineq pisinnaalerutta nunatsinniilersikkusukkatsigit.

Taama naatsumik oqaaseqarluta Katersugaasiviit pillugit inatsisissatut siunnersuut akuersaarparput.